

Յայ-թուրքական հարաբերություններ. Նոր երանգներ

Համառոտագիր



Մարդկային
գարգացման
միջազգային
կենտրոն

Յայ-թուրքական հարաբերությունների կարևորությունն անցնում է Հայաստանի սահմաններից անդին. դրանք էական նշանակություն ունեն թե՛ հարավկովկասյան տարածաշրջանի համար, թե՛ դրանից դուրս: Հայաստանի և Թուրքիայի միջև երկխոսություն հաստատելու ջանքերի ձախողումն իրականում խորացրեց հարաբերությունների բարելավման գործընթացի լճացումը: Հնարավորությունների պատուհանն այլևս փակվեց, իսկ Միջին Արևելքի ու Հյուսիսային Աֆրիկայի տարածաշրջանում հետագա զարգացումներն զգալիորեն փոխեցին այդ տարածաշրջանի երկրների շեշտադրումներն ու առաջնահերթությունները:

Երբ Սիրիական ճգնաժամն արդեն մոտեցել է իր նախաշեմին, Անկարան ավելի քան մտահոգ է կանխելու պատերազմի ընդլայնումը դեպի իր հարավային սահմաններ: Այն հատկապես զգուշանում է քրդական հարցը ներքին օրակարգում մեկ անգամ ևս զլուխ բարձրացնելու հավանականությունից: Երբ իր երկու ձեռքն էլ արդեն զբաղված են, բնական է, որ Թուրքիայի համար Հայաստանի հետ հարաբերությունների բարելավումը մղվում է երկրորդ պլան: Այդուհանդերձ, մոտենում է 2015թվականը, և Թուրքիան պարտաճանաչ կերպով կատարում է իր տնային աշխատանքը՝ հակադարձելու Օսմանյան Կայսրությունում հայերի ցեղասպանության հարյուրամյակի համաշխարհային հիշատակության միջոցառումներին:

2015 թվական. իրական ջրաբաժան

Հայ-թուրքական հարաբերությունների կարևորագույն առանցքը Հայկական հարցն է: Այդ իսկ պատճառով կարծիք կա, թե Մեծ Եղեռնի հարյուրամյակը կարող է շրջադարձային լինել: Այդուհանդերձ, ուսումնասիրելով Անկարայում և Երևանում իրականացվող քաղաքականությունը, պարզ է դառնում, որ ինչ-որ էական գործողություններ առայժմ չեն ձեռնարկվում ո՛չ այնտեղ, ո՛չ այստեղ:

Չբաղված լինելով տարածաշրջանային զարգացումներով՝ պաշտոնական մակարդակում Թուրքիան առայժմ բավականաչափ ջանք չի թափում արտերկրում, անգամ երկրի ներսում նախապատրաստելու հանրային կարծիքն առ այն, թե ինչ կարող է լինել 2015թ.: Թերևս գերակշռում է այն ակնկալիքը, թե Թուրքիայի ռազմավարական դիրքն այս անգամ էլ թույլ կտա նրան հաղթահարել այդ օրվա մարտահրավերները, և Անկարան մեկ անգամ ևս կխուսափի «ճգնաժամից»: Սակայն Թուրքիան փորձում է այդուհանդերձ կանխել 2015թ.-ի հավանական վնասները՝ բարելավելով իր հարաբերությունները հայկական սփյուռքի հետ և դեռևս իր ձեռքում պահելով հաղթական խաղաթուղթը՝ արձանագրությունների ստորագրման գործընթացը վերսկսելու նախաձեռնությունը:

Մեկ այլ վերսկսված նախաձեռնությունն է ԵԱՀԿ Մինսկի խմբի համանախագահների հավանական փոփոխության կամ առնվազն Նոր ու ակտիվ անդամների ներգրավման շուրջ քննարկումները: Բացի իր թեկնածությունն առաջադրելուց, Անկարան բավականին ջանք է գործադրում, աշխատելով այլ երկրների, հատկապես Գերմանիայի հետ՝ հորդորելով վերջիններիս ակտիվորեն մասնակցել Ղարաբաղյան հիմնահարցի կարգավորման գործընթացին և արդյունքում փոխել Մինսկի խմբում առկա ուժային հավասարակշռությունը: Այսպիսով՝ Թուրքիան առնվազն երեք ուղղություն է նախապատրաստել Հայաստանի հետ իր հարաբերությունների ընթացքը որոշելու համար. Մեծ Եղեռն, Լեռնային Ղարաբաղի հիմնախնդիրը և արձանագրություններ: Իրականում այս երեք ուղղություններն այն երեք նախապայմաններն են, որոնք Թուրքիան առաջ է քաշում Հայաստանի հետ դիվանագիտական հարաբերություններ հաստատելու համար:

Ի տարբերություն Անկարայի՝ հայ-թուրքական երկխոսության լճացումից հետո Երևանն իր ուշադրությունը սևեռեց միայն Ցեղասպանության ճանաչման խնդրին, այդպիսով բավականին նեղացնելով իր ուշադրության կենտրոնի շրջանագծերը: Թերևս Հայաստանի համար նման քայլը կարելի է ընկալել որպես հաղթական ռազմավարություն, քանի որ պատմականորեն արձանագրված է ցեղասպանության փաստը, միջազգային հանրությունն այն օգտագործում է Թուրքիայի վրա ճնշումներ գործադրելու նպատակով, իսկ հայերին վերաբերվում է որոշակի արգահատանքով: Սակայն հայ-թուրքական հարաբերություններում առկա խնդիրների ներկայակալը սահմանափակել միայն մեկ գույնով՝ Ցեղասպանության ճանաչման ջանքերով, խնդրահարույց է: Արդյունքում նախաձեռնության առավելությունն անցնում է Անկարային, որն աշխատում է մի քանի ուղղություններով և այդ իսկ պատճառով մասնավորապես առավելություն ունի:

Սահմանափակող կառուցողական անորոշություն

Երկու կողմն էլ փոխադարձ հարաբերություններին վերաբերվում են կառուցողական անորոշությամբ, այն է՝ զգայուն թեմայի վերաբերյալ անորոշ ձևակերպումների գիտակցված կիրառում, որը հնարավորություն է ընձեռում առաջ տանել որոշակի քաղաքական նպատակներ: Նման մոտեցում կիրառվում է



Երևան 0001
Սայաթ Նուվա 19
Հեռ.՝ +374 10 582638
Ֆաքս՝ +374 10 527082

mail@ichd.org
www.ichd.org



բանակցություններում, երբ կողմերը, համաձայնության եզրերի գրեթե բացակայության դեպքում, ցանկանում են կոծկել վիճարկելի խնդրի շուրջ փոխադարձ համաձայնության գալու իրենց անկարողությունը և միևնույն ժամանակ փորձում են դա այնպես անել, որ կողմերից յուրաքանչյուրը կարողանա հայտարարել, թե իրեն հաջողվել է զիջումներ կորզել մյուսից: Թուրքական կողմը մտադիր է ցույց տալ, որ հայ-թուրքական հարաբերությունների բարելավման գործընթացում առաջընթաց կա, անգամ եթե այն շատ դանդաղ է, և այդ իսկ պատճառով նա թողնում է արձանագրությունները որպես «գաղտնի խաղաքարտ»: Հայկական կողմը նույնպես վերջնականապես չի բացում իր խաղաքարտերը՝ մինչև հիմա բացահայտորեն չանդրադառնալով Թուրքիայից իր պահանջներին, որոնք Հայոց ցեղասպանության ճանաչումն ի վերջո իրականություն է դարձնելու: Երկու կողմերն էլ ասես սպասում են համաշխարհային զարգացումների հետևանքում առաջացած երջանիկ մի պատահականության՝ բացելու իրենց խաղաքարտերը:

Սակայն, հայկական կողմը պիտի պատրաստ լինի տարբեր հավանական սցենարների: Իսկ ի՞նչ օրինակ, եթե թուրքական կառավարությունը որոշի ճանաչել 1915-1923թթ. իրադարձությունները որպես ցեղասպանություն, սակայն մի պայմանով. ազատում հետագա ֆինանսական և/կամ տարածքային փոխհատուցումից: Իսկ եթե Թուրքիան բացի՞ իր սահմանները 2015թ. ապրիլի 24-ին՝ ցուցադրելով միջազգային հանրությանն իր «բարիդրացիական» վերաբերմունքը՝ սակայն իրականում դրանով իսկ շեղելով մամուլի ուշադրությունը Ցեղասպանության հարցից: Սա ցույց է տալիս, որ կառուցողական անորոշությունը, որը միգուցե տեղին մոտեցում է կարճաժամկետ նպատակների համար, արտաքին քաղաքականության ոլորտում ենթադրում է որոշակի սահմանափակումներ: Եթե հստակ նպատակների բացակայությունը մանիպուլյացիայի հնարավորություն է ընձեռում մյուս կողմին, ապա պարզորոշ սահմանված նպատակներ ունենալը թույլ է տալիս այս կողմին ձևավորել բանակցային համաձայնությանը հակադիր բազմաթիվ այլընտրանքներ: Հայաստանն ապագա տարածաշրջանային և համաշխարհային զարգացումներն արդյունավետորեն կկարողանա օգտագործել միայն այն դեպքում, եթե այն ունենա փոխհամաձայնեցված նպատակներ և համապատասխան հիմք: Չարգացման բազմաթիվ սցենարներ կարելի է առաջարկել, սակայն բոլորն իրականում փուչ կլինեն, եթե բացակայում է վերջնական նպատակը:

«Կամ...կամ» ի հակադրություն «և...և-ի»

Ամեն դեպքում «սպասենք-տեսենք» տրամաբանությունը կարծես այնքան էլ արդյունավետ չի: Ավելի նախաձեռնողական մոտեցում է անհրաժեշտ: Հայաստանը պիտի օգտվի այս հարաբերական անորոշից և պատրաստվի փոթորկին: Հայ հանրային ընկալման համատարած սխալը չափազանց նեղ մոտեցումն է. միայն մեկ գործողություն է դիտարկվում որպես հաղթաթուղթ՝ աշխատել կամ քաղաքացիական հասարակության մակարդակով, կամ պետական, նպատակը սահմանել որպես կամ Հայոց ցեղասպանության ճանաչում, կամ սահմանների բացում և արձանագրությունների ստորագրություն: Իրականում, սակայն, այս գործողությունները պիտի զուգահեռ իրականացվեն, քանզի դրանք միայն նպաստում են փոխադարձ հզորացմանը:

Հայաստանի իշխանությունները պետք է շարունակեն տարանջատել Հայոց ցեղասպանության, Լեռնային Ղարաբաղի հիմնահարցի և սահմանների բացման խնդիրները, ինչպես նաև դրդել Թուրքիային բացելու իր սահմաններն առանց պայմանավորելու այդ գործողությունը նախորդ երկու խնդիրներով: Սահմանների բացումն այլ աշխատանք է ենթադրում: Ներքին քաղաքական հարթությունում համապատասխան գործողությունների թվում կարելի է նշել հանրային կարծիքի նախապատրաստումը, տեղական գործարարների և միջազգային բիզնես ընկերությունների ներկայացուցիչների հետ աշխատանքը, տարբեր օրենսդրությունների գնահատումն ու ենթակառուցվածքների հարմարեցումը: Միջազգային հարթակում անհրաժեշտ է բարձրաձայնել հիմնախնդիրները, ընդ որում տարբեր դերակատարների կողմից, որոնց թվում մամուլը, քաղաքական գործիչները և գործարարները: Սահմանների անմիջապես և առանց նախապայմանների բացումը, որն արտացոլում էր Երևանի դիրքորոշումը, պիտի կրկին ներառվի Հայաստանի արտաքին քաղաքականության գործիքակազմում:

Համառոտագիրը մշակվել է 2012թ-ի դեկտեմբերի 19-ին կայացած՝ «Հայ-թուրքական հարաբերություններ. 2012 -2015թթ.» վերնագրով քննարկման մասնակիցների կողմից արտահայտված կարծիքների հիման վրա:

Կլոր սեղանին մասնակցում էին անկախ վերլուծաբաններ, պետական պաշտոնյաներ, միջազգային կառույցների ներկայացուցիչներ:

Քննարկումը կազմակերպվել էր «Սև ծովյան տարածաշրջանի խաղաղաշինական ցանցի» աջակցությամբ: